

21A rekod baru SPM

Beliau mengamalkan memakan kismis, kurma dan air madu sebagai makanan untuk menajamkan minda dan ingatan.

■ ATIQAHYAACOB

PUTRAJAYA - Keputusan peperiksaan Sijil Pelajaran Malaysia (SPM) yang diumumkan di Kementerian Pelajaran Malaysia (KPM) di sini semalam melakarkan satu rekod baru apabila seorang pelajar lelaki dari sebuah sekolah di Pekan Yan, Kedah berjaya memperoleh 21 A.

Pelajar pintar itu, Azali Azlan, 18, merupakan penuntut pertama dari Sekolah Menengah Kebangsaan Agama (SMKA) Yan, Kedah yang berjaya mencatat kejayaan yang membanggakan itu.

Berita kejayaan itu diumumkan oleh Ketua Pengarah Pelajaran Datuk Alimuddin Mohd Dom semasa pengumuman keputusan SPM dan Sijil Tinggi Agama Malaysia (STAM) 2007.

Pengumuman tersebut juga sekaligus memadamkan rekod Nadiah Amirah Jamil dari Sekolah Menengah Kebangsaan Tun Sardon yang memperoleh 19 1A dalam SPM 2006.

Azali, anak ketiga daripada lima beradik, mengambil mata pelajaran Bahasa Melayu, Bahasa Inggeris, Matematik Moden, Matematik Tambahan, Fizik, Kimia, Biologi, Sejarah, Pendidikan Islam serta Bahasa Inggeris dalam Sains dan Teknologi (EST).

Dia juga mengambil subjek Prinsip Akaun, Perdagangan, Ekonomi Asas, Tasawwur Islam, Pendidikan Al-Quran dan Sunnah, Pendidikan Syariah Islamiah, Bahasa Arab Tinggi, Sains Teras, Geografi dan Kesusasteraan Melayu, dan Pendidikan Seni.

Azali sememangnya pelajar pintar sejak di sekolah rendah lagi apabila mencatatkan keputusan 5A da-



Azali bersama ayah dan ibunya yang turut hadir di Putrajaya semalam.

lam peperiksaan Ujian Pencapaian Sekolah Rendah (UPSR) dan 9 A dalam peperiksaan Penilaian Menengah Rendah (PMR).

Tanpa had

Ketika ditemui Sinar Harian, Azali berkata, dengan keazaman yang kuat dan cita-cita yang tinggi telah mengatasi segalanya dan beliau berharap dapat menyambung pengajian ke luar negara dalam bidang bioteknologi.

Menurutnya lagi, tip yang dilakukan untuk mencapai kejayaan ialah dengan menumpukan sepenuh perhatian dalam pembelajaran di dalam kelas dan serta perlu kerap membuat ulang kaji.

Belajar secara berjadual dan fleksibel merupakan rahsia pencapaian cemerlang Azali sebagai pelajar terbaik SPM 2007.

Menyedari mata pelajaran yang

diambil bukan calang-calang jumlahnya, pelajar pintar ini terpaksa menyusun jadual dengan teliti agar tidak ada satu pun mata pelajaran yang diambil akan ketinggalan dan tercicir dari segi penumpuan.

Beliau mengamalkan memakan kismis, kurma dan air madu sebagai makanan untuk menajamkan minda dan ingatan.

Di samping itu, sebagai umat Islam, Azali tidak lupa untuk bersolat, berdoa dan memohon restu dari Allah SWT agar diberi ketenangan dan sentiasa yakin ketika menghadapi peperiksaan tersebut. Dia juga tidak lupa untuk berpuasa sunat selama peperiksaan berlangsung.

Katanya, bukan niatnya untuk menyaingi atau memecahkan rekod sesiapa sebelumnya, tetapi keputusan yang dibuat untuk mengambil 21 mata pelajaran tersebut disebabkan dorongan guru dan keluarganya terutama ibu bapanya dan katanya yang paling utama adalah untuk kepuasan dirinya sendiri.